


PL
2698
.J82

~~V.1~~
V.2








Digitized by the Internet Archive
in 2010 with funding from
York University Libraries

自序

夫詩而不能志時者非詩也然時爲詩所志而時尙忍言哉吾悲
關雎麟趾之不勝黍離而鹿鳴之不勝弁旻也危敗餘生風烟避
地岵岵瞻陟抑又雙潛予之時可知詩亦可知矣追憶平生出處
獲際昇平身歷華胥栩栩如夢繇今思之此可復得耶其稱詩遂
自崇禎乙亥後系曰詠懷堂某年詩而後倣此焉

石巢阮大鍼漫題



叙

向余從集之爲牛首遊集之有落葉滿空林句余亦有深機相接處一葉落僧前句今歲集之集其丙子詩遂以前句冠簡牘刻成適白蕩老人從橫山來掛錫牛首千餘年後續此橫出一枝佛法而曠代詞人直下知歸滴血擔荷喫寒巖骨立千林髮脫落葉依根轉身就父我輩前日詩竟識集之今日事亦奇特矣集之文章經濟凌古鑠今嘔心風雅如獅子王搏象搏兔皆全其力以陶儲王李爲門庭漢魏爲堂奧三百篇爲歸宿故其詩沉鬱頓挫清新俊逸無不有明興以來一人而已然此以論丙子丁丑以前詩可也集之今且橫按莫耶全提一句唱無生曲作大號吼山林水鳥咸助發機細語麤言總標實相誰敢復以文人眼會集之末後句然輞川主人夙世詞客不妻不肉投迹空王竟不得與裴措大同入傳燈總成孤負集之不惜鼻頭付白蕩老人扭捏則大雄峯頭

一喝三日耳聾是何音調

丁丑仲冬廿有三日

弟馬士英具草

詠懷堂丙子詩卷上

晉熙集之阮大鍼著

齊安退思杜祝進較



雨中同馬中丞瑤艸吳元起宗白循元登牛首夜集

寒山何可陟落葉滿空林更聽巖間雨難爲燈下心
報閒資野酌給夢與鐘音軋軋慈烏語爲予此夕深

葉聲開野步共悟此身閒獨樹立寒色諸煙爭晚山
朋從空翠裏影寓古幢間祇慮松牕曙塵機又欲還

懔方明菴

太息龍門令寥寥蠶室居如君能執戟較此意何如
沂澤迴天馬秋牕注魯魚深情念雞骨涕泗及荒廬

避世何辭放還嫌舌尙存修烟馮鳥逝廣汐快魚翻
共對高松月

同浮野菊樽特憐秋草外烽火照江門

壽卓左車尊人襄野六十

晚歲逾徵蟠木情兩高歷歷少微明煉芝自受真人訣種菊聊閒
身世名芸閣青緇翻蠹帙草堂紅葉隱雞聲青山即此堪綿曆不
藉松喬與結盟

羣紀論交誼倍妍家風因識太丘賢弓裘不忝名卿後緱珮能居
衆嫵先芳畹露豐黃獨長山厨釀熟紫鱗鮮遙知撰酌梅花日自
曳流鈴踏海煙

歲晏何次德過論文竟夕

荒廬荏苒及殘年藉有同心問草玄官閣梅花眞映玉兵厨竹葉
不須錢高文欲廣鷗鵬旨曠野何妨虎兕偏香雪寒燈中夜語將
君古處各悠然

與馬瑤草同宿范華陽居瑤草述其逝姬有感

暝煙綿下澤，息影向梅花。土屋春何靜，松牕夢亦嘉。種魚陂水活，拊粟野風斜。不識高閒意，誰先處士家。

閒身同古木，寒盡不知春。偶及平生事，還悲夢裏人。飄風憐絮旨，空水悟蓮因。坐待霜松月，還來洗劫塵。

元旦感懷試筆似搏仲式谷仲立

東風曳曳動門羅，窮巷纔知歲序過。赤羽吹笳纏淑氣，黃巾飲馬截春波。移家轉向烽煙裏，流目行如蘅杜何。尙憶故園逢令節，竹林椒酒正婆娑。

士女爭迎梅柳新，隔江鼙鼓自振振。薄陳生菜烏皮几，緩酌屠蘇白髮人。龍尾花磚無復夢，熊丸荻畫亦生塵。獨憐拊拾春烟次，平野蕭條好負薪。

雨夜感懷似何計部蓉菴

寒雨蕭條竟夜鳴，荒雞喔喔自呈聲。憂天寧恤監門緯，醉地難陳

穎叔羹百感集于高枕後苦吟若爲短檠生廻思詠唱春鶯日飄
忽桑滄未可名

支牀萬慮已如灰鼙鼓甯堪振地來吳市甘從梅福隱江南偏劇
子山哀椒花報歲香空坼芳草隣暄淑自廻願得烽銷農野綠將
君破涕閱春杯

子卿過晤聞其徵辟信賦此

羣居迷節序荒草自爲羣地暖蕙初兆林和鳥漸聞酬恩長禮梵
遺世益攻文賴有平生友時來就白雲

聞說明時辟行將至伏鸞聊扶雞骨杖欣岸鹿皮冠渭水釣能釋
媧天補未難野情無外繫林夢爲君安

搏仲社長自里中過慰賦此

高樹悲風警敝廬君來始憶歲將除霜帆影白寒沙雁雪汲烟青
凍釜魚避地餘身兼草土暮年古處篤詩書初香更悟林花坼聊

澣椒觴慰索居

壽葛震甫七十

春色憺然至江梅暖盡開與君坐花下高詠且銜杯
市隱瓜猶種園香橘可媒戲投陂水杖節節吐風雷
駟馬曾乘傳遙遙向碧雞歸來洞庭曲琴酒日提攜
虹氣垂丹井芝霞衛竈泥林中縱雛鶴珠頂囑來栖

過訪王宮詹覺斯

仙曹希長物芳草與閒雲蠟屐偶然至辛盤勞見分
煙和禽耐嚼花暖葉知芬遙想春星下緱山鶴亦聞
香雪離離外江峯碧自妍彈琴喧竹里挂笏閱桑田
吏隱三山曲情深六代前春林鶯詎弱斗酒會難偏

上元前一日集汪遺民托園用鄰字

客中生菜又傳新小飲煩君漉葛巾高士清琴長在
榻短牆野竹

自爲隣晴風欲展芳蘅色香雪爭疏小樹春來夕帝城應不夜還攜餘興向車裯

柬郭侍御雲機

寇迫江浦侍御有安輯金陵功

淮肥烽火照連營方召伊誰效請纓藉有柏臺綢戶牖遂令榆社建干城平陽訟獄啼烏繞司隸風裁市虎驚曲徙鎬京推第一何人不羨郭喬卿

繕備都忘改歲期單車幙被向荒祠辛盤深抱無魚感子夜猶聞介馬馳舊巷烏衣重有壘新亭白羽復何悲江氓藉穩漁磯夢引滿狂陳茄鷺辭

用韻答程計部穉脩

晴臯蘅杜綠將宣綰佩慙居衆嫫先釀秫不空彭澤壘誅茆聊結杜陵椽詩書古處風無改飲啄農臣興亦偏攜取玉琴彈楚調瀟湘碧月爲君還

同葉少宰以冲吳廷尉玉華集西園看梅花

春陰浮野色衆綠漸已萌咏賞既開園柯條競懷英
諸氣發潛慮釋體亦輕遂整石路策來觀初葉榮語默入空香羣嫵先我盈
碧酒樽中鮮素豔林端明鳥泯悟花重烟晦聞雞鳴悠然坐天機
良話還復傾靜意持繁喧斟酌焉可名
攀采縱安希聊用夷予情
壽馬瑤草年伯母六十

寶婺晴空正陸離春城復值管絃期碩人象服瞻玄髮令子麟毫
冠白眉爲政莫非循乳哺籌邊特代衍機絲維都父老宣雲士
偁首同申阿母卮

桃花玉洞日初長砌暖蘭蓀更吐香鴻案刀州猶並舉熊丸績室
獨先嘗親調神駿騰千里手補山龍勝七襄媿我紫泥多躑躅
湧衣時與乞仙漿

張二無聞罔卿命暫還毘陵來別論詩竟日復日佳句見投

賦答

芳草能有情萌芽及荒宅池脈既浮動林光漸開坼閒琴聊獨撫
良友適來益握手坐班荆喧繁幸咸釋汲就澗中泉蔬陳籬下碧
靜悟花葉香肆矚春雲赫古誼逼層漢微言響寒沙念子官廿年
圖書羅四壁門柳自蕭條巾車欲何卽時事多難虞聖人下躬責
飲犢遞洵淺駮牝馱方闢甯淦山鶴盟力整雲龍策茹檠植坊表
采薇振巾幘蔭我堯天雲謳吟動枯澤

張勳卿湛虛過訪以近詩見示賦謝

春風爾何自吹綠漸以盈臥起空香中彌愜幽栖情故人念離居
高駕爲我縈聊釋梅鼎杓來零蘭谷英園木宛相待林禽亦諧聲
朗懷對雲曙良話削清琴三復示我詩琅琅陳冠纓野心亦嵯峨
負耒薄有鳴經綸仗雲雷險動屯且亨歲月方舒徐農桑遂生成
中宵行飯牛旦事壠上畊多感翊堯天保我稼穡榮

送左侍御左漆報命二首

驄馬春風曾首途，卿雲爛爛照皇都。
好陳隴右金城策，詳繪江南鄭俠圖。
殿虎青陽開氣色，宮鶯紫禁聽傳呼。
懸知攬轡重來日，桃葉芳蘅綠未枯。

浦口風烟江上雲，遙看征蓋入斜曛。
太沖賦著人爭誦，充國功成帝亦聞。
直柏竦青瞻古節，甘蕉斂碧避彈文。
江農就饁棠陰下，野犢山雌自可羣。

盧參軍子占從虔州至過訪止飲

鬱孤梅蘂忽傳香，高駕翩然集草堂。
少婦燕梁爭比珥，參軍龍劍正如霜。
披襟林下譚何劇，岸幘燈前舞欲狂。
小摘園蔬炙春酒，與君白石詠難忘。

茅止生從閩海回過訪賦此

閩海烟嵐復幾重，馮君麾羽靖高烽。
迴軍疊奏朱茄鼓，中賜將傳

玉靶弓橫鼻青春
閒徙壁鷗夷碧月好推篷停杯起
眎山籬外不分江天挂晚虹

送汪瑤若還皖予亦將問海門棹矣

春江聊極目新柳挂寒煙
念爾揚舲去琴書自洒然
巖松花且兆林竹筍初延
試熟彫胡米遲予禊石泉
問字盈羣彥如君才亦稀
奇懷縈翰墨忍力謝輕肥
冠嶺標雲格開潭悟月機
遙知行咏處芳草碧微微

雨中將理歸棹過方肅之感賦

芳草不勝雨翻過寒歲寒
天時正如此對酒復何歎
末季詩書苦深文菽水難
渚田看野雀飛止獨能寬
閱世何多感春醪勉共持
詎堪違野性祇益憶平時
農晦青無恙漁潭碧未移
還攜舊朋好客與拾江蘼

旅懷呈青山相國

聖代何多故潢池警未舒殷憂無乃甚策力詎全疎野月啼枝鵲
春星點鬪魚尤憐江甸草新綠正虛徐

鼎臣休澣地朝夕傍鍾山邵圃長依闕鴻歌未出關朱絃淒獨夜
綠野照愁顏定感堯天夢殷勤下築間

春雲詩爲湛虛勛卿覺斯宮端枉集賦

春雲肆矚言蔭衡廬風疏林鳥沫集蘋魚婆娑花藥乘暄告舒感
此和節杖藜投屣石戶開琴山樽銜醴客亦高軒翩其來止鷄鳴
深樹鶴舞前岑蔬香登椀蕙氣馮襟清池演漾滌影徵心乃就班
荆乃陳論譴輕陰疑雨檐懷維漠靜對籬山衆青咸若悠悠時運
俛仰何嘆良朋旨酒釋此無歡逍遙白日規景云殫荆薪代燭餘
興盍盡云動不繁志意彌敬露下星高清言殊聖升車執袂我心
忉忉霞縈遠岫草暖平臯願言重過攜手日敖

靈谷寺雨中與項司成水心言別卽宿月泉菴

松境不知雨蒼寒自有聲于茲酌春酒一爲駐雲旌野鶴來銜綬
芳梅試點羹山厨陳紫芋何異嬾殘情

慵折江門柳醞醑就梵筵玉琴聊一整山翠亦冷然犢踐平莎水
雞鳴野樹煙煩君仙掌上龍雨給春田

山牕何可寐松雨滴空林持此蕭疎意聊閒離別心風泉矜靜夜
燈火肅春陰及曙覘行色高雲亦釋岑

送子又姪還皖

遇末凋傷久荆花悵獨春有懷馳夢路對爾憶風神芝朮蠲身患
鹽齏念母貧竹林非遠別感此亦沾巾

春帆入何際烟草綠微微篷月飲沙埠漁燈衛水扉獨行嚴語默
薄俗戒輕肥寂歷山牕夜螢光未可稀

旅懷寄憶豹叔

石門湖草色亂後復如何念子牛衣地春寒侵女蘿櫓槍貫芒角

庚癸易農歌安得浮漁艇春鷗共白波

隔岸驚烽火因知天塹雄山川元自險疏鑿亦何功斷渡淵魚懾
嬉巢社燕同廻思觴咏處高柳曳江風

集趙侍御二瞻園中用程穉脩韻

芳菲次第展春城高樹將啼出谷鶯池草有碑銜石闕林花延夢
到金莖長安月向鍾山吐仙掌雲從淮浦生吏隱居然稱柱下商
坪綺季復何盟

壽張文學玄樞六十

司玄窈窕有靈書脈望從君辨魯魚津暖春雲龍並躍霜清秋羽
鶴長梳丹房煮石堪辭穀烟駕流鈴好步虛我亦相隨飼神雀養
成毛翮似瓊琚

贈黃母紀孺人節壽

孺人撫前子如己出官主簿有聲

青谿環珮靜聞香黃鵠雲中矢獨翔是地懷清臺可築彼姝貞木

咏何長留田晨哺無呱泣矮屋宵機有義方皎皎令儀難與絜柏
舟千頃自汪洋

湛虛勛卿呂和遺民集小亭詩見示用韻賦答

春陰涵物象慮澹酒閒傾花氣若微雨禽言徵晚晴林香能感屨
瀨月亦尊纓此際天俱穆何論人世情
不藉山陰墅松間亦有枰還嫌折屐淺自負爛柯輕飲研見馴雀
啼花無寂鴛興來忘率略膝上素琴橫

送傳四兄還皖

春來池上草綠與故園同鴈影寒空外鵲原細雨中遙飛江畔席
相眎髣髴蓬努力山厨酒風煙莽未窮
江塢長吹雨離離竹自閒無琴延碧月馳夢到青山契闊歎難已
蹉跎春又還寄聲石巢石留薛待躋攀

同王京兆玄珠徐侍御孟麟集南高閭卿宅時問卿令子文

孫皆在座古誼殷然感舊賦此

春林何靜穆向夕御琴樽古處誼仍昔同心言盍繁幽香矜橘服
秀色擘芳蓀此會陳荀後重令象緯尊

玉珂聯步地回首祇空烟門柳色已翠春醪香且鮮卿雲抱鍾阜
霖雨漑江田願得偕高士絃歌適莫年

同葉少宰以冲徐岡卿南高洪憲副覲宇集徐侍御孟麟林
亭賦

春風睨笑動高丘炊黍班荆事事幽萬卷平分玄草閣一竿何負
綠蘋洲琴樽定不虛陶徑烽火無聞照瀨裘把臂與君偕作達野
雲林竹碧悠悠

灩澦驚濤不耐聞歸來高枕玩春雲樽前一石碧長滿籬外數山
青且紛煙靜寥蘿招木客星寒焚朮禮茆君瀛壺更採秦時藥人
世于今未可羣

走筆贈蜀僧慧菴新安僧大乘

古雪皚皚欲覆眉殘函爲展月開時市聲忽歇鐘初定春雨長寒
衲未知趺坐閒心觀夕照休糧屢日罷煙炊石頭卽是峨嵋路笑
指桃花更莫疑

錫飛何必指千峯天闕天門共晚鐘合掌蓮花皈象教過頤卬竹
自龍鍾閒支石鼎長煨芋慙臥山牕亦聽松何日遺身向空界與
君黃海辨秋鴻

壽忘所上人六十

松雲如白石晨夕照巖扉靜者觀心地天花自在飛礪香山候暖
潭定月痕微一悟無生忍應嗤海鶴歸

剡谿流古月普照白門松數息綿龍性休糧著鶴容林紅銷一雨
江翠列諸峯遙想無言際空香觸未窮

金陵春感

晴風吹衆綠合沓至江門自令冶游起寧知元化存金鞭鳴廣陌
麗服照中園獨此閒牕下山花笑不言

六代山如史興亡備此中陵園識誰是歌舞幾曾空舊燕栖無擇
新鷲唱轉工野情復何與緩酌向春風

顏若齡自皖見訪雨中感賦兼懷幼玉瑕仲

漠漠江帆雨君來集遠心寒溫及山翠觴咏尅春陰犢澗軍烽滿
魚深稅歛深特詢芳草路何地托行吟

衡宇相望處遙思上古天鳴梭弄秋葉扣角響春烟月白同千里
山青又一年不知腹臘日誰汲石門泉

宗白寓鄰菴時相過析疑義

塵肆何鱗鱗炊烟自蒙被結茆雞犬中禪誦胡絲遶頃者夢覺間
肅肅鐘音異始悟青靄人瓢笠于焉寄孟水現潭月簷枝領峯翠
喧寂了非我平等旨奚二相望不牛鳴晤言期每至芳草本忘機

山光舉相示微風時一來庭松響秋吹願
目雨餘花施我悠然意
大方廬中目集韻詩見示感賦

春雨響不已與君分此寒欲銷爾時淚聊憶故年歡歸雁程猶滯
巢鳥羽未乾牕間陳綠綺腸結不能彈

遙念門山曲春鷺唱又新不知烽火後誰是采芳人
摺粟炊能繼
綜詩咏未貧寥寥簷雀外文史獨相親

再遲若齡小集

風吹江上雲西來何悠悠孤帆是因依翩然如雲浮
蕭艤出花浦
杖策至椒丘顧我苦次骨慊歎不可收感子幽蘭心志氣相與柔
古人重結交誼亦如此否長跼陳清醕脉聽無或偷斟酌在平生
雞黍誠匪謀

芳草不予欺春深門已碧雨至發清響稍霽罕行跡
整撥籬戶間
寧爲車馬客道喪望終古遙遙無羽翮箕高穎復深荒彼歸雲宅

壹持沮溺心黽勉固窮策晨起自灌園饑來但炊石入夕彈青琴
吾曰召吾益

空城雀

爲和州僦而賦也

空城何有白日灰灰流賊飽而去流雀饑復來白骨爲丘陵亂髮
如青苔羣啄嘖嘖鳴不顧烏鳶猜城中有遺老當市哭且哀爲言
羽林郎十萬皆雄材願乞三尺符令赴空城隈挽弓挿箭如風如
雷誓當俘雀殼醢雀脂懸雀之首于高旗京觀築爾何纍纍此功
努力猶可爲死後解倒懸陰隲彌呂奇不然野雀再飽如賊飛將
爲把竿稚子裸袒相笑嗤

哭和州侍御馬訥齋

侍御守和甚力以援兵不至城遂陷率

妻孥死之

野哭春江動綠波歷陽白骨正嵯峨賀蘭不遣貔貅至睢水其如
鼠雀何爪自透拳悲魯國魂長捐珮感湘娥無衣欲紹秦庭泣忍

聽傷心隔谷歌

何方伯大瀛移樽小亭賦謝

綠蘿黃鳥語古意滿春園君復能醕我高軒還見存炊魚殮不薄
羅雀道何尊偶及人間事青山憺盍言

提壺芳樹下知不負鶯歌雨止林聲穆烟綿草色和肅琴向清夜
縱釣有晴波別後逢明月梅花夢正多

卜子寧相訪卽送其遊姑孰爲古意新聲六首

三尺要離塚年年青草生男兒戀鄉曲湖海欲何成仗策有之子
出門遊帝京回看埋劍路鴉背夕陽明

秋金兼夜玉車馬自煌煌雀噪野銜日雞鳴天雨霜碎琴過槐市
挾瑟上蘭堂徒步長歌起誰堪學楚狂

樓桑禾黍動雀滿翟公廬自飽脫粟飯兼炊幸舍魚山精偕種藥
天姥共翻書冉冉騰雞犬淮南術未疎

君懷何磊落才亦孔璋鄰遙負彈魚鉞來尋飯犢人鍾山松路雪
遂步柳條春晨夕貪吟賞囊空不算貧

酒酣矜意氣莽莽一呼盧自哂貂裘盡難從武媪酤江干唱桃葉
山上采薜蘿調笑逢壚女殷勤索玉壺

青山垂薜蘿山鬼宅其中況有騎鯨客乘流御碧空春江照花月
水鶴叫松風于此投書劍平生意亦雄

寒食感懷偶步郊外

烟火雖無禁愁生倍柳枝故年寒食節是母授餽時雀乳拋殘毳
蠶繅響斷絲感茲魂百折淚雨不能垂

亂後青門道笙歌不肯稀烽塵聊自遠游冶未全非地暖蚓潛出
煙和蝶互飛風光與時序惻惻使心違

古意

華燈照清夜無令笑白頭高樓出飛鳥炙酒椎肥牛馱笙過北里

解珮向西洲人生誰滿百惟此可忘憂

茆頂有仙客我往叩長生綠髮照瓊戶丹唇吹玉笙朝憇峯陽木
夕拾海月英賴看巖室外陵闕多松聲

修禊日范司馬質公招同壽春方侍御孩未移酌小亭賦謝
中園燦芳樹黃鳥鳴其枝叢蘭被堦堦逕荇藻開澄陂絺服御春風
寒燠聊自知恬步空香中蝴蝶隨我飛遂就石澗泉薄澣纓上緇
雖罕童冠儔明此禊祓期清機何豫人林坐憺忘疲兀然盡一觴
不爲幽獨欺新蔬摘盈把舊穀聊自炊寧知蓬蒿外高駕能復來
軒從何煌煌照我門前柳薄踐竹林歡特招淮南友戎旃洵清暇
眷言酌春酒碧樹羅前軒青山對高牖累歎旣彌襟蹇芳復攜手
籬下樹花藥屋後陰榆杻自負堯天氓耕鑿頗不苟帝夢懷衾衣
周南諒非久爲問手中樽能共菊花否

用韻酬吳明府閣生

至人遺外慮花藥閉閒房置身如孤雲崑壑善所藏龍蛇蟄且深
鳥雀廬亦荒鍾山春雨來庭竹森琅琅紫葛翳石壁綠蒲冒芳塘
玉琴中夜彈其聲清呂揚感彼茆真君授之補腦方竦體排崑崙
雲海空茫茫滄溟露龜坼精魄臨鶴鄉饑孽綏山桃渴浮華頂漿
世人逐腥腐有如秋螢光富貴豈相貫年隨時運翔招之不可迴
徒令增慨慷

寶刀行贈王貞吉參戎

王將軍美且鬖少年意氣傾幽燕感時頓投手中筆結交盡散床
頭錢寶刀三尺懸秋水摩挲劇于十五女提攜上馬渡桑乾橫行
直奪醫闔壘前者虜入喜峯時孤軍力護礪碎車不分冠纓有巾
幘口嚙指血旋上書天子憂胡臨便殿謂君南八今重見親題勅
尾付廷論從此義聲轟赤縣年來左肘頓生柳閒向粉榆晦身手
岡坡逐兔呼鞬鷹日醉荆高市中酒金陵三月江花紅遙遙仗策

鳴春風司馬親爲撫猿臂行行力挽天山弓邀君坐此芳樹下柔
條一繫紫騮馬軹深不作夷門空眼中誰得如君者黃巾白羽何
紛紛中原一掃欃槍氛至尊麟閣許相待努力努力王將軍

採桑曲

日照天氣綠立馬桑之隅持筐泣路傍云是秦羅敷不怨蠶多饑
不怨桑甚徂使君重禮義妾亦貞自持行行重行行太息羅敷夫
出入羽林騎調笑酒家胡羅敷足棄置壚女則有夫壚女亦有夫
調笑何其愚

柬秦沛縣行甫

廉吏安可爲恆苦寒且饑廉者復攻文所苦行倍之爰象排其胸
經緯植其軀花下撥清琴晨夕聊自怡逋負恕鞭責逢迎拙言辭
寧遭上官罵恥抱神明疵達哉秦使君宰沛不再期義弗絳塵冕
投効從此辭六翮排青雲雀鷄誰能追

聞君客秦淮五見春草綠但飲建業水厭聽烏栖曲紅葉蔽堦井
青燈射鄰屋朝夕對鍾山清唌忘斷續茗粥安素心文史悅恬目
有時烹隻雞笑言招近局春廚洩糟香桑寄酒應熟

贈畢今梁

今梁西洋教士

若士乘桴自沃洲十年日月共中流書經雷電字長在手摘星辰
較不休閒御鵬風觀海運默調龜息與天游知君冥悟玄元旨象
外筌蹄亦可求

雨中約損之郊遊不至賦此再招

春艸日萌芽禽言漸能嫺懷此于野情期君理閒步傳君抱琴樽
茲遊業已屢始悟蓬堵間兀坐向成悞微雨花應晦稍霽烟還鷺
誓當遂招攜高吟響芳樹不爾青陽適風物又成故

毛比部修之范計部仲闇招集仲茅爰爰園汎舟賦

林園入春靄景氣彌以尊渺與市煙隔祇覺禽言繁羣賢既畢集

妙論亦閒翻山樽眷漁舟宛歷桃花源頗極沿棹力一轉開一村
巉壁削猿路潔瀨清魚魂僮僕出花隙飲饌陳蒲根曠致感希有
高韻瞻獨存笑謔忍云疲淹留頓遺昏燈火照歸路屈別申一言
紅蕖瀉香露素月表松門誓各抱琴來秋期請勿諼

遊仙詩寄鹿菴相國

樓桑有鴻隱抱犢畊芝田一謝塵冕欺蚤悟長生傳白雲手自鋤
青山朝對眠遊值若木憇饑吸滄海煙有時排空虛親受王母詮
使作盡青童毛女尤嬋娟仙音固繚繞流鈴亦鏗然頰脉虹綵下
丘垤何連蜷桂樹靈不實薤葉光且鮮哀哉下土人壽命無一延
生爲霜露欺死乞鳶鳥憐

桴居立烟外蒼蒼遠人跡野坵南浦青檐挂西山碧此中有至人
終年脩羽翮勤翻玉斧書慵發金滕策壑泉牀下鳴崖乳牕間滴
空潭春雨過百藥苗盈尺沮溺詎能然箕穎亦堪斥不識丹籙中

可注天台客玉簫弄江花清琴響寒汐願騎海鶴來嗷嗷呼白石
鍾西謫居彭城脩子房祠成徵詩遙賦

遙望雲龍山春至草應綠傳聞漢子房峩峩結祠屋松鱗絳未已
黃石苔長覆林邃時囀鶯堦靜或眠幘吾友博陸儔謫居在河曲
一與世俗違欣然整初服長懷圯上翁恨未辟梁穀盡解杖頭緡
力爲繕荒塾鳥革旣翩翻龜趺亦蹲伏無事此吟眺雲天散恬目
海變桑且枯誰能破寒燠芸閣_秋閒糟床春酒熟何當拾席來
從君理茗粥擊石招古人狂歌響林麓

謝劉司空簡齋見唁

簡齋正以河事 雲廷尉待白

支牀遺外慮門雀亦無喧春草坐中變風花簷外繁寒溫切雞骨
辛苦問鵠原杲杲蘆中日相呼誼各存

傳君疏鑿處舟楫利春波縱有流言及其如河伯何啼鳥春夜曲
天馬澤中歌解作兼雷雨皇仁正不磨

鳥啼用宋王象慶聞赦事
天馬用栲里牧恭遜仇事

閩海楊孝廉明箕見訪得呂司馬書感賦

閩海玄亭草未蕪
翩然負笈入菰蘆
春宵客路聞鴻雁
煙雨家山夢鷓鴣
愁至問天無嘆語
亂來浮海亦窮途
高樓碧酒渾無恙
破涕看君倒玉壺

吳洲新水照芳蘅
對爾彌增古處情
易地各銜癘鶴羽
支牀同聽亂烏聲
繭絲蔀屋猶呼斂
烽火春江未解兵
爛爛牛歌中夜起
短簑長自戀躬耕

柬呂司馬益軒先生

春夜月長白春江
柳復青所思在吳會
高尙有儀刑土屋炊牛飯
山煙響鶴翎
璜魚閒可釣谿水日泠泠

平田燒野火朝出自扶犁
草際見微路村中來饁妻
水生蒲葉上日照杏花西
向夕招鄰曲春醪亦可攜

結室秦淮浦長看鍾阜雲
烽烟何莽莽歌管自紛紛
世事甚于夢

閒心聊屬文青楓兼碧草延思到夫君

自媿偕司馬名聯元祐碑如何風木感涕泗亦同時天意元無我
流言空爾爲君恩南畝在努力共蓄畬

有懷楊岡卿豐之

海氣東南來濛濛千里白草晴悟煙象鳥飛著霞跡念子別玄亭
七載淮陰謫圃暄藥長種籬秋菊仍坼何用寫離愛賴此樽中碧
年來曠野悲宛在高陽客門雀感已深臯魚淚難釋徒懷海鶴思
未掛滄洲席遙念堯天雲春陰垂廣澤依依楊柳風熠熠倉庚翻
剝啄懷山阿夢路復誰格

雨泊江上感懷呈以冲先生

江花暖無序江雨及宵鳴賴有燈前酒聊開旅泊情聚螢違夕諷
抱轡輟朝畊何事風煙裏相從汗漫行

策力羣公在農臣何所之先民垂格論避地倘予欺海燕翔沙浦

春魚入野炊行行共舉采知不負江籬

舟過采石望和州諸山感賦

春帆遵鳥路隔渚見青山戰伐兼栖隱銷沉共此間荒祠蕃鸛鶴
小市族魚蠻日夕天門水悠悠碧未還

亂後江村絮爲憐泯泯飛鳥啼春竹苦蝶戲土花微自切民生感
誰云廟算非國殤與山鬼未敢重歔歔

飲酒詩四章

人生閱穉壯至老方形休來往百年內日月亦以修憂勞不填之
拱手將何謀殤子化誠速無異菌與蟬安知在鬼神不爲高曾儔
白楊吹野風荊棘被層丘仙人多白骨朽去不復留懷此酒樽空
過千歲憂

圖鳳旣以逝元化鮮所存運會有必然誰能還其源所以魯中叟
載興浮海言去茲數千載滔滔更何論犁星兆東作驅牛向南村

風雨不我欺
菜麥相與繁
力此事便已
日夕傾一樽

綠苔罕人跡
廉館何寥寥
此在全盛時
賓客志已饒
晨風趨茂林
時禽弄柔條
誰能違所欣
獨握樽中瓢
田父兩三儔
頭各插素標
朝去暮復至
隻雞屢見招
生則偕桑麻
歿當共蓬蒿

三山限海隅
不死識何藥
縱令逢仙人
授我長生籙
栖栖華表間
夙形已爲鶴
同輩無一存
孤禽安所樂
不如約遠思
純然向糟粕
深柳和春煙
野筠釋秋籜
籜時至夫何
留欣欣去冥漠

舟中雨夜聽王將軍貞吉談遼事

鑿閭苜蓿散
秋烟曾副輕
車逐左賢此
日推篷閒聽
雨中宵說劍
響如泉壚邊
白馬長呼酒
獵罷黃羊自
割鮮絕塞馮
君橫意氣看
予飯犢種春
田

雨泊荻港遲方肅之不至

楚色蒼然來
江昏帆且止
冥冥營虛無
春雨響未已
明燈復扣舷

悠悠念吾子友朋關至情留滯應有以炊黍就荆扉弭棹蒹葭裏
所未共清機盡此樽中旨夜久身心寒孤琴颯焉起相遲乘汐桴
一報中洲芷

舟中同博仲損之宗白賦

鷗江春夜雨滴盡十年心汐氣一何蕭川流藉此深海鯤開浩思
山鬼束悲吟吾亦忘吾我誰能弄夕琴

雨中憶家大人子處先慈殯室并以紀世道人心之變未有
甚于此時者

白華江畔雨蕭蕭行子單衣感複陶聖世幾曾懲菽水深文何得
駭漁樵慈烏哺子啼春樹獨鶴梳翎立莫潮此際之魂俱百折不
知誰賦楚臣招

山公久已謝聲聞尺籍偏能溷鹿羣名隸胥靡應負築身非蕩子
學從軍庭青不返叢護色江白愁瞻老樹雲到底農臣無遠略安

危終不代諸君

舟中贈能止

能止蜀僧近住天界半峯菴

濛濛花月路何自戒香聞偃息向前浦
隣舟見有君汲瓶注春浪槌磬響川雲
歷亂看風絮峨嵋雪又紛半峯千樹響
宛在浪花間擁衲聽春雨江鷗無此閒
燈然漁埠火錫指鳥前山安得乘輕荻
偕君往復還

丘中聞時事

天上風雲久未諳近來特事滿農談
儒林盡黜臧三耳瑣闥新徵妄一男
似爲甘陵摧黨幟直將優孟媿朝簪
野人但種春田黍自領烏犍飲碧潭

江上逢聖羽來唁感賦

秋星垂竹露古寺待鐘時忽忽與君別
芳蘅綠復滋佳辰偏兆淚曠野拙陳詞
祇覺篷牕下風燈集鬢絲

帆前迷往路艸綠帶長川心遠轉無緒愁迴一莞然名從牛口重
道莫蟹螯賢吾夢絲來穩高峯臥碧煙

贈黃明府位兩明府清而幹爲危邑所倚濬壕之役尤有萬
世功

鷗夷久已入鷗羣負耒重過皖上雲不爲紉蘭招隱士爭傳剖竹
有神君省畊長繫稠桑馬繕備親提細柳軍近日石門春雨足農
歌漁笛正紛紛

千頃清風自穆如政聲穎上並璠璣峴花深覆羊公碣江水新穿
鄭伯渠村墅綠蕪歸社燕滄浪白石戲鯨魚野夫日酌堯天酒高
枕長懸下澤車

歸次詠懷堂哭先恭人

避地且歸來吾廬宛仍昔風暄門柳青雨止江雲白野鼠各緣桁
山雞自啼柵麥榮熟已齊蓬蒿亂無摘巢燕何奴軒顧我反成客

堂中機杼聲堂前綦履跡徽音儼如在慈靈復奚適一身等飛鷺
百念頓攢戟長號安可持淚與莓苔碧

初歸感舊賦

盡室孤城中此身匪隣父寇已薄楚豫天且卽陰雨弦高椎肥牛
包胥泣秦廡白媿殊後時卒瘞亦何補喋喋輕薄兒寧識徙薪苦
百口且如蛾啄我甚于腐近有賢使君熊車撾鷺鼓獬獬旣革面
鴻雁遂敦土願執候人爰還舞俞兒弩請君緩豆萁無令急焦釜

春寒感懷先恭人

春寒應作雨霖霖固其常然于雲倦時旋圻林日光山鳩屋上鳴
石燕沙中翔江風庭前來瑟瑟欺我裳我裳匪絺綌被體如秋涼
女蘿亦有姿蘭蕙亦有芳憐無慈母縫使我中懷傷

江上還石巢

春風變榆柳草色綿川塗杖策還江臯弊廬幸未蕪籬外山更青

園中綠已敷僮僕三五人力作猶勝無麥飯爲我炊雜治樵與蘇
鄰曲歡我歸雞黍煩見呼生鮮麴蘖緣飲水聊自娛官長多賢明
盜賊聞以逋努力事畊鑿租稅未可渝子亦何所爲兀然長據梧
優哉復游哉高臥安其愚

還江上草堂柬史使君道鄰

薰風遙向五絃來獵獵江干畫隼開淝水漫推車騎略漳河重咏
史公才烏犍畬火綿平隴朱鷺笳聲動大雷近日煙深春草闊輕
鷗飛去復飛廻

荒廬脩竹碧森森掃戶猶鳴原憲琴賴有熊熊饒遠略遂令鴻雁
起歸音青門瓜蔓緣坡廣白社蓮香飲露深璧月高閒刁斗聞不
煩梁甫切悲吟

觴肅之太史初度

去年懷此日君正急鵠原不自憶弧矢馮誰共酒罇故鄉芳草候

初夏竹林園迴想勞勞際因知飲啄尊

山齋炊麥飯碧酒復閒傾對此班荆坐無殊采藥行長源矜芋火
弘景溺松聲君獨觀元化蕭蕭不近名

聞葉以冲先生起南大宗伯

六朝冠珮自雍容禮樂匡時藉秩宗安得江烽銷士馬欣聞階羽
屬夔龍碩儒帝用爲調鼎新法人難及負春旦夕履聲親黼座商
霖應漑北山農

爲方仲來題竹墩

湖雲亦何白湖水清且閒聞君結茆屋前對湖上山朝看羣鷺浴
夕矚飛鳥還碧酒香自酌素月光可攀有時坐松牕展帙開胸顏
竹館琴一鳴衆綠聲潺潺小艇撥秋花沿棹非所艱何當摘菰菱
爲予啓柴關

送張儀明之仁壽任

噓蜀看君捧檄行青山樽酒對離情千峯路向猿聲轉百丈泉從
鳥道鳴鹽井春煙谿唱滿錦城秋月夜絃清遙知萬里橋西曲潭
靜花繁待濯纓

將下石城別史臬使道鄰二首

江城韓范藉經營鷺鼓紉紉肅有聲禹貢車書原自集堯階干羽
況初平青山建隼軍烽却白石呼牛燧火明更是葛貧高馬骨滄
浪還與咏纓清

浣榆聊乞展烏私迴首簷帷繫所思越國有薪長獨臥監河無米
更何炊身爲霖兩人皆潤手障狂瀾俗未漓願得鐫歌秋吹滿野
人來與菊花期

舟中憶石城諸知己

柳碧秦淮惜袂分迴艫片席挂秋雲綢繆妄欲捐雞骨飄泊曾何
媿鷺羣松閣幸還弘景臥草堂聊謝稚圭文厠祿薄浣渾閒事荷

屋從君摘露芬

用韻答周安期見訪

卜築青谿隱意深蕭蕭蒲葦領秋音
閉門自整登山屐置酒長輪
賣賦金六代幾曾成往昔孤筇誰與限登臨
將君長揖三茆客霜滿煙平若可尋

用韻酬史弱翁見訪

荒廬容抱膝楚楚閱公卿
秋黍自然熟山厨何所營
露花垂枉渚月樹隱高城
此際重攜手幽吟細細生
皖上風烟滿因之廢遠遊
麥魚艱拮炙花鳥入離憂
祇益銜枯石誰能抑橫流
新亭礧礧地近淚不堪收

秋雨臥病感時事成詩四章

軍書頻向日邊來
油幕鈴門晝不開
慵望高丘悲練馬
重招熱客盡樽壘
時流競集紅襟語
胡騎何煩白羽麾
征虜雅知饒勝略
酒

旗歌板莫相猜

秋風蛇豕滿中原北海難開此日樽丞相已無門可掃將軍徒見
樹空存關山月冷梅花苦易水烽高蒲葦昏昏爲語援師須暗度烏
江猶有未招魂

北望和陽萬骨枯饒歌露布尙傳呼堪搔蟻蝨嵇中散誰詛鳩鳩
楚大夫上將柳營虛絳國郎官桑陌狎羅敷絲來射虎推身手一
疏批鱗動兩都

秋艸柴門雨不休雀羅雞骨迴含愁河山是處移桑海羈旅誰人
效麥舟茂苑空懷麋鹿繞高臺何日鳳凰遊吟餘閒步長千里瑤
管金羈莽未收

賦贈張洪川先生

先生令子爲湛虛大助卿

滄陽有鴻彥抱剡向層丘振衣林慮巔濯足漳河流讀書三十年
愴然爲天游祭酒經生間羣駿無敢儔解薛宰峨岷治聲方雲浮

賓人舞婆娑巴女爭獻謳山啓旣巖巖龔魯何足侔忽然賦遂初
高翮不可收墨綬固土苴絃歌亦蚍蜉政成長歸來門柳風颭颭
邯鄲繁麗地車從絡并燕走馬復彈箏意氣長翩翩于此有至人
弗爲流俗遷植禮如山丘澄心則淵泉槐棘森陰閭駟乘何連蜺
處貴不自怡履道彌沖然詩書爲弓裘力田窮歲年有時趣所會
行吟五柳前山杯花下琴慮釋體若仙近就百泉漱遙對嵩雲眠
所以張長公千載師其賢

九日得鍾西彭城書賦致范司馬質公

古處將君二十年如今聚首各憂天爲憐雙鬢絲俱白敢問同車
草正玄秋徑暖看蝴蝶戲山廚味覺蟹螯賢落英自采參差菊窮
巷何妨有斷煙

九日江扉晝不開彭城欣有帛書來忍言交道今如土自是閒身
久作灰旅燕依棲元至渺海鷗踪跡復何猜何時得附玄英杖飛

塵青油日幾迴

湘臣焉敢賦離居帶索行吟屢晏如
斯養邯鄲非舊將軍宛雖有高車
鍾山露白遙聞鶴淮浦煙青好捕魚
近日草堂叢桂發天香繚繞一床書
安危策力仗明公憂杞何煩問老農
帳下射聲皆似虎盾頭點墨亦成虹
黃沙直搗磬閭塞赤羽兼銷楚澤烽
自哂野心無所與蕭然閒聽白門鐘

和韻酬文啓美見贈

銷憂未敢效羣公白石狂歌意亦雄
慵寄眼光牛背上全休生計蟹螯中
閒吟江畔楓初落澹思籬間菊幸同
賴有青山酬賦客蕭晨莫放酒杯空

高秋極目雁賓時江外風煙不可知
犢鼻自憐聊復爾鷗夷不醉亦奚爲
餐將青蒻心徒苦枕到黃粱夢已危
遙憶洞庭今宛在垓

邊香草繫予思

詠懷堂丙子詩

卷上

二十一
益山精舍

詠懷堂丙子詩

卷上終

詠懷堂戊寅詩卷下

石巢集之阮大鍼著

同社豹叔錢文蔚較

靈谷月下聖羽至

山月滿庭樹樹靜山更涼
良友坐此間幽意殊相當
澹然共茗粥清論浮蘭香
起或步松徑倦卽休竹房
世人如蓼蟲習苦不自傷
漫游哂禽向降夢儔羲皇
非君秉素心定復嗤予狂

酬契玄至靈谷見訪

深林麋鹿共忘機支遠遙遙至翠微
石路繞松長覺遠筇聲蹈竹
即如歸高譚六月鳴寒瀑彈指孤峯下
夕暉爲約長于鐘月夜杖
藜訪菊啄秋扉

柬蔡懷真

聞君歸鵲印大笑還江邨廻視梁肉間誰是夷門恩人生貴樂志
何必羈華軒邊沙沒馬蹄蠻霧搖鳶魂不知事農圃旣朝亦日昏
綠穗養南疇朱槿照中園雞黍會親友語笑闐衡門長鑣與高轡
不識何者尊秋山青映籬秋秫香盈罇從君訪菊花予當策烏犍
予家皖山中朝夕警烽羽知君屢提軍備歷征行苦枕戈雪覆橐
解甲蝨成縷此卽畫麟閣百瘁不一補何況中山書請謝冠軍組
男兒可憐蟲斯言不予侮較之牽犬翁庶幾尤爲愈東臯有犢車
前溪有魚罟本自不決絕世情何足數樵唱出松坪棹歌入蓮浦
君沮予亦溺予巢則君許寧甘髀肉生莫効聞雞舞

謝呂冲先生見訪靈谷

遺身入香界靜覺山雲尊草蔓已妨路松翠長隱門偶影良有悟
自招山鳥言悠悠身世外謬欲窮眞源逶迤行谷中莫有紫芝存
芝采無復餘白石纍纍蹲丹木爲樵蘇雲彩充庖樽同心念當來

儲此目代殮

高駕出青門遙遙歷深草爲眷松下風載念林中好夙約知勿渝
未謂及茲早聊摘邵陵瓜兼驅輞川棗晏息當青山山光卽懷抱
竹露洗慮塵石泉蠲吻燥惻惻念世情六鑒自趨搞

酬震甫與治見訪

何處堯時天谷口松雲是漁樵侶亦稀鐘梵理恆邃久處覓身心
或恐化寒翠感君敦夙期雙策颯然至園葵摘露香林筴奏清吹
山厨醞不儲烹泉取相媚淹留至瞑烟巾車又當駛握手柴荆前
屢與歸禽值清論行復遙賴有疎鐘嗣

印海招集青林堂同可止循元不溢得皎字

東亭集茶燕尙覺情緣擾未若深谷中竹房閉蘿篠上人如孤雲
偶向青林繞微微烟路開時一待歸鳥知予隱意真露葵摘清曉
相與破塵跡相解出言表草涼蟲響繁山靜鹿柴悄坐久星烺烺

四矚羣峯皎

酬質公大司馬見訊

谷中不知夏松路青沉沉出戶踐鹿跡方晝來猿吟愛此不能去
願作松際禽朝飲紫葛露暮憩碧山岑道書行尙把華髮散不簪
所未閉樵路阿閣貽瑤音故人范令公槐蔭何森森一身如谷王
四海推甘霖誼若三秋蘭字比雙南金宛然共顏色敢曰懷所欽
翳翳谷中芝三秀良可紉用備朱鳳飧聊明青扈心

送一門住攝山

一公絕塵垢其人卽翠微禪將春草深句亦天花飛攝山有茆屋
竹厚芋且肥夜溜細鳴礪秋雲閒隱扉君往往其間能使青山輝
支遠不敢儔世人焉可希霜滿烟復平予亦知所歸煩君行藥時
爲報山中薇

康居閣同諸衲友送陳旻昭北發

薰風動祗樹白日照香林塵尾既交驚茗椀咸共斟君子慕天衢
解薜辭幽岑寧爲希世榮將以弘法音良玉不隱璞秋蘭何用紉
曾謂遺物淺不如應化深留嘯與山猿讓粒還松禽易地見秋月
共作蓮香吟

先秋二日與毓先損之印海一門循元雪照不溢雪葉坐樹
下共用聲字

幽栖莫辨道心生暝坐移牀讓鹿行若有林光疑月白豈無山響
報鐘清共矜支許能忘相爲哂巢絲尙近名更擬此中留再宿高
梧一葉待秋聲

緝汝式之見過谷中

石路鳴高策知君采隱心浮名看槿落清論與松深舉世爭辛苦
誰人能陸沉歸軒停谷口似欲待栖禽

九衢多熱客一壑臥清流坐聽松風響還嫌谷未幽身長依梵歇

夢只與雲謀秋至多佳夕還期共鹿游

走筆贈無能

綠蘿閉戶不知路紅藥立堦方數層終日焚香看般若誰人向子學無能

靜對青山無一言秋林落葉細相翻請看朱雀橋邊日猶逐歸鴉到寺門

過不溢精舍

過君栖影地花竹翳精廬出戶或行藥對山長讀書鐘因兼息數寵亦貸雲居靜覺孤峯上松風滿太虛

酬程育先見訪

君有青山心來問麀麀跡谷芝采不遙谷松深可宅信宿蒼寒中坐見秋雲白靜夜如古初清吟素潮汐君家何代翁賦詩嘲熱客如君意更閒悠悠自爲適衛履藉荒草放琴出深薜後期行復來

秋林月當碧

李紫函出靈谷相訪道值卽過集小齋聽友人彈琴

君抱歲寒心看松來不速予若松間雲偶然出空谷相逢大道傍
日照榆柳綠四矚天雲光晶晶蕩心目高興各未盡笑指城南屋
犬吠動深林蟬聲接修木何不杖藜過東籬酒應熟

敝廬既不遠攜手復同歸應門識好客爲啓松下扉草堂進茗粥
藤架攤絺衣清商何處來有客彈金徽一彈秋水白再彈雨雪飛
琴止良話開竹露清微微

谷中詩

爲容自太蒙兩先生
見訪靈谷而賦也

屏居中谷言采其蘭丹霞舒岫碧月栖巒于此遵養既浚且寬鐘
止琴生峯開雲起晏對長松若侍君子未謂高軒翩其來止好風
自南吹袂及心班荆蓮社展屨芝岑林間之葉載響幽禽脫略樵
蘇烹葵而飯良話未終青山云晚目送巾車予還偃蹇黃虞不作

慨何藉予水中之鳥西上之魚荷鋤而暇聊讀我書

謝張崑岡爲疊山石

婆婆向高館當書樹陰直如何人境中忽現翠微色却立涼雲生
坐久嵐氣逼乃知移情故經營悉君力于茲覩匠心卽目覘隱德
深草鳴陰蟲喬林望歸翼琴觴于此間微尙焉可測期君朝暮過
開樽酌胸臆小徑閉苔花共脩高士職

柬程乾一聞其尊公大拜

賓門納麓集諸賢清德而翁讓獨先共說調羹元宰手不殊晝粥
老生年聚蘆力補高天石舞羽平銷絕塞烟農圃從今瞻帝日好
驅黃犢種江田

遺佚何煩抱杞思鯤鵬聞已運天池好將清白酬千古盡寢玄黃
此一時良弼夢長孚帝座後賢清亦畏人知欲彈貢禹冠烏有但
賦卿雲八伯詩

贈陳上元魯直

六代清音正不磨
羨君于此領絃歌
政成闕有德
鳬集人靜庭惟
野雀過江樹
春紅村雨足
露杭秋碧晚
烟和一塵穩
傍烏衣里棠
蔭深深及荷簷
剖竹栽花切
帝居口碑京
兆頌璫璣傳
家舊有麟臺
疏退食詳翻
鳥跡書孤嶼
高雲盤野鶴
海塘明月媵
文魚于君清
曠殊相宵召
杜誰爲遜不
如

靈谷再集諸衲友松下看月得寒字

不有窺林月
寧知松路寬
池身開霽白
澗氣集蒼寒
逸侶旣交得
清言殊未闌
特憐支與許
莫與此宵歡

酬黃給諫水簾入谷見訪

久從山澤游
曠竇已成性
役形向塵壒
懷抱何絲淨
雞鳴草路白
山月光未竟
及此策巾車
心跡冀相并
松宵雲未破
花曙露猶映

迴視烟海中日出事何競君獨踐山約努力扶塵笄采隱趣已饒
濟勝具彌勁徧探藥路遙坐覺禽言靜飯罷歷翠微逍遙吐高詠
君官夕郎時鶴聲並高潔批鱗至再三履尾不辭啞寤寐一相求
斯人必寒子與君投分懽元氣感萌燮溫詞吐春蘭澄懷照峯雪
乃知至人身四氣備無缺竟日對清機超然謝羈紲念有故人招
又與松雲別所幸隱含香金門若丹岳秋壑被烟霜寒潭納壑洌
山雲可持贈未忍獨怡悅片月懸花宮汪洋候來轍

微雨坐循元方丈得有字

隱几憺忘心懼爲松雲有秋樹一鳩啼微覺沉冥剖遂起弄書琴
清言響山牖雨從中峯來白日化蒼黝霑濡雖未給煩蒸諒難久
夙具蓮花根況對香林友閒吟露草間霽月復來否

雨後喜一門雪葉柏城過訪得適字

雨止夢能閒蒼然罕人跡晏起步中林林外秋峯碧早露花際浮

餘雲松上積谷中來笳聲遙遙觸深薜車馬旣多違漁樵漫何識
始知諸上人剝啄至烟隙共結塵外蹤割我山中適鹿響山更青
猥叫月仍白好理蓮社吟莫負秋潭石

同一門谷語雪葉柏城自靈谷入攝山道上偶成

襍被又何適向雲深處行還疑值林叟未盡廢將迎棗熟禽爭啄
榆涼犢自鳴所欣賣漿處不問老夫名

積翠亭亭外秋山人甚閒莫將塵世事攜向古雲間涉露躋香閣
追霞叩石關東峯松路白明月又當還

至攝山東恆覺

放策投香林村村歷禾黍誓就白蓮香悠然破餘暑槐葉掛秋蟲
松根竄山鼠上人臥窗中高興白雲語巖前青桂花風吹落如雨
中峯月下同一門谷語恆覺雪葉柏城共用林字秋字

秋山鐘梵罷高屨陟松岑坐見草根白斯知月氣深猥音流衆木

蟲響蔽孤琴此夕饒名理持之叩道林
靜抱中峯膝清機詎易酬百爲如入夢片衲自支秋若使桂花發
又爲山鬼留遙憐城市月歌管日悠悠

書慰文殊菴

息機入空翠夢覺了不分靜抱虛白意高枕鴻濛雲一禽響山窗
亦復嗤爲紛臥足日已夕起步罕所羣暝壑松風來悠悠吹我醺
此中日月殊百藥生霞紋谿葛花蒙茸巖桂香氤氲飲澗綠虹下
嘯月玄猿聞僊靈定來栖招隱曾足云

送谷語東行

秋清山月白巖桂復叢生正可開賢社君胡事遠行嶽雲迎錫響
海月待經聲試洗勞山鉢重參古德情
青楓江上路蘆影去悠悠縱匪鹿麋聚能忘鴻鴈愁律香吹夜月
花雨散孤舟行徧趙州脚君還未白頭

重登太虛亭有感

百藥氣何盛孤亭松上開日生還日落雲盡復雲來一壑有如此
六朝安在哉寧堪空翠裏秋露滿蒿萊

屢放高峯屨悠悠不記年片帆秋草外細路古雲邊石鏡照華髮
山鍾催晚烟松風臨夕響身世已蒼然

登攝山頂共用影字

石竹蔽山窗人閒臥長永信宿于此間幽意薄能領秋懷曠難持
又欲越松嶺鳥飛花路殊雲切藥房冷高界意謂盡齊心有餘騁
廡下踏峯霞窗前簷帆影深會轉無得却立發孤省始悟夜氣中
此處損聲警

將出攝山可止雪照至卽止宿文殊菴

以下原書闕一葉

山秋深漸當嘉巖桂浥露氣籬菊冒霜華與君飲美酒爲君折疏

麻

謝陳駕部止宜見招

屏居無妄營憺然覽幽獨牧豨乘草屨驅雞閉茆屋閒矚無心雲
悠然挂秋竹君子事嘉招再三及蘊軸譬彼九臯音遙接鳬與鴛
顧念原野中猶未釋種稂霜近壺當剪風燥棗恆熟願言穫淨時
涼雲卷修木買藥入城市柴車駕羸犢予轄予自投從君醉籬菊

山中送方仁植開府入楚

田間何所事刈黍乘秋暄客自城中來云君拜新恩鐃吹發漢口
旌影臨荆門君負川嶽望誓掃雲雷屯膏雨漑遺庶霜草芟游魂
成功報天子錫馬于焉蕃賢喆志竹帛愚賤安丘樊荆舒壤垣錯
唇齒相與存方叔在上游皖口亦以藩予當負釜春裾粟還江邨
願擬平淮頌用代臨岐言

懷范計部仲閣

不見史雲久蕭蕭懷甌塵每從山月夜江上望清真食貨倘新志

圖書仍舊貧知君對琴酒應憶竹林人

吟對峩峩峯雪蒸時破鬱陶廚長繕鮭菜衣不釋綈袍但取蟹螯美
何嫌馬骨高幾時公事暇雞黍就蓬蒿

與楊朗陵秋夕論詩

山夜何悠悠星光如月白清響繼鐘聲感此百蟲夕與君坐秋花
披襟細研益大雅喪千載追琢擬何適時尙奚足云所嚴在古昔
齋心望雲天柴桑如可即廬嶽峙孤霞溢口汎寒汐天不生此翁
六義或幾息厥後王與儲微言增羽翮二坻衍清波三茆著雲跡
異代晞髮生冷泠瀨中石一禽霜壑啼寸溜冰厓滴舍是皆洳沮
偶匯亦溝洫勝國兼本朝一望茅葦積滔滔三百年鴻濛如未闢
感君討論眞狂言吐胸膈話止向秋峯中宵岸巾幘山阿如有人
迴風動蘿薜

山中懷損之臥病

秋峯漸明翠深草微有路遙識空際香因憶林中露此時山阿人
正可騁閒步念子臥藥房悠悠閱朝暮微痾肖孤花高枕敵秋雨
谷口已獨往天開游亦屢特遺黃海雲遲君理高屨

遲豐之問卿未至

晏坐向山窗綠陰垂隱几竹晦鳥潛下木冷蟬未已泠泠澗戶間
響識秋琴美故人勤夙心遙遙溯淮水挂帆湖草外擊汰漁烟裏
先期宿翠微未見巾車止莫是過蕪城山公爲烹鯉相遲步荆扉
薄暮松風起

谷語真休過祖堂露坐偶成

夕陽秋草路雙策颯然來高樹散餘暑隣峯聞薄雷世情松嶠隔
山夢竹房開共飲蓮花露陶陶勝酒杯

穗子稅

山僧無所資給林中拾穗子範之爲念珠諸方往
鬻焉乃不免于稅稅之自某計部始也或曰爲市僧

野鷹知不避征徭何似追呼到鵲巢枯木堂前青穗子張騫槎上
不曾饒

藜杖筠籠下碧苔此珠不是寶山回殷勤囑付持行者顆顆分司
報稅來

雨中不及赴唐祠部損占招賦謝

野身無定向隨意臥秋鐘石竹搖空翠籬花立晚紅偶然聞夜雨
遂起失晴峯好待中林月扶藜一過從
所至香林頌云君清且仁蓮花文士習甘露宰官身閉戶聞山鳥
題書問逸民秋田農務暇剝啄定相親

與豐之山中夜話次日遊天闕諸勝

經年臥荒草不辨此時秋我法卽君法言愁始欲愁青楓蔽原野
白露滿汀洲更欲扶雞骨相從賦遠游

炊黍秋烟動樵漁誼亦存明燈山葉下飲露草蟲繁坐久起虛籟

情深開謔言寒溫聊一吐遂覺曙鐘喧
世情何足道溷清不堪聞鳥獸羣皆可蠓蛄聲並紛但能存碩果
無取叩靈芬君試攜玄草來栖上古雲
與君步天闕握手覽山川白露長江水青綿六代烟陵園秋樹裏
車馬夕陽前一悟興衰理誰能輟莞然

同豐之仲芳過孟麟吉山別業用仲芳韻

三徑喧聞耜子迎草堂星聚正秋清談經細辨雄文字下榻歡聯
高士盟彭澤黍田紅可穫蜀都桑晦綠俱成銜杯莫話市朝事牧
笛漁歌無限情

自養青芝媚谷神不煩白眼閱時人冥鴻自古多高翮飯犢今看
有健身林下且傾家釀酒馬頭不到庾公塵五湖烟水年年濶熊
夢無煩擾逸綸

同陳中丞幼白赴魏國徐六翁招

名園松桂肅秋陰野客翛然與盍簪
泉壑直通僊掌氣雨暘頻話
藎臣心午橋綠野開篁嶼西室青
燈照墨林但願銷憂多暇日
犢
禪鳩杖奉登臨

江上送豐之罔卿還淮海

秋峯列翠照離樽遙望孤帆去海門
但有書籤抽武庫幸無藥裹
附文園

豐之病初愈

十年穩把淮魚釣九辨高吟楚鳳雛
努力芹羹兼

麥粥謫居何日不君恩

天衢蔚薈已無餘自有幽蘭媚素居
華髮久疎車後夢白虹長照
獄中書豈無日月明鈎黨何必風
霆掃顧厨至日梅花春已到香
風應貫子雲廬

用韻答陳同年平若見贈

江雲偏向石頭寬六代青山倚醉看
林下壺觴長藉竹幽人啼笑
每吹蘭遺身久已超蠻觸影息何煩
集射干不學河間張內史歸

田梁甫賦薶難

秋草蟲啼野寺門相從盡日倒山樽閒行潭水心逾遠高枕峯霞
夢亦尊南舍衣裳晴可曝東行象緯夜難昏何時放策凌天姥芝
朮將君細討論

柬肇禧中翰

予昔小草時君亦官薇舍扈從聯宮磚寓直對清夜朝回典春衣
花間引杯斝斯時海內無烽塵八荒日月懸雙輪閒官但憇高馬
骨拂土無可批龍鱗萬曆聖人坐凝碧宮中雲門憂金石野花啼
鳥識笙歌鴈臣影國通繒帛君歸高臥白門烟予亦種稻長江田
兩朝龍髯攀不得至今干羽徒紛然黃巾赤血吹腥霧移家遙就
金陵樹故人對宇懽復懽彈棋賭酒無朝暮君不見城上烏烏柏
樹折巢亦無又不見梁間燕臺城古瓦細飛霰古來田寶與牛李
茫茫黃土蒼煙矣參商穀維一生心丹墨雌黃寸函紙羨君斗酒

盈芳樽羨君玉樹醵隅園大笑東方一愚老侏儒饑飽爭金門

題平若雲在樓

聞君臥高閣朝夕看雲生靜掩古人卷都無塵世情浮名觀落照
夜氣肅秋聲閒挂窗間笏遙聽海鶴鳴
山雲足怡悅來去總無心霜樹挺寒色風榛傳遠音遙峯長對酒
片月自依琴更不煩投轄朋來定盃簪

用韻酬紀文學伯紫

兼書其二賦

望衡如復接清塵避地猶矜有健身詞賦擬君爲玉斧聲聞賴呂
轉金輪人其如菊師彭澤筆可爲耕代子真欲與雒陽分涕泗眼
中年少更何人

姑孰晤李周生

青山流影入空江江上逢君倒玉缸大壑鯨鰲濤不弱高臺鳳去
思難降誰云宮錦人千載宛在秋燈月一窗佳句陰鏗重得似籬

花石竹響淙淙

九日同貞菴元甫象台周生登龍山

率此孤雲跡聊存野菊心同人何次第整興向登臨遙楚引深眺
高雲生暮陰青山何代物照酒到如今

壽顧母姚孺人八十

春風玉樹烏衣路昔時王謝今姚顧風雲何但紹簪纓英靈更復
鍾荆布別駕先生千尺枝賢媛葛藟相紛披翰墨生香吳苑草衣
冠垂蔭汝南祠風霜未敢催貞木紫鸞不馭歌黃鵠慵招狡獪預
仙期自剪機絲課兒讀佳兒受書母鄰前熊丸啖盡窺人天旦暮
之間見丘索唾咳而外無雲煙龍駒矯矯稱名士鼎養三公等閒
事紫泥行拜聖人恩青緇先煮神仙字石竹秋花映草堂板輿行
樂樂未央靜夜流鈴聞衍誥長齋繡佛自焚香予與虎頭附雞埵
澹交古處誰不羨願予銅狄三摩娑阿母是時仍挫薦

初度感懷呈蕭大行伯玉黃給諫水簾馬中丞瑤草葛參軍

震甫

弧矢平生興已衰
陶然偶影自銜杯
蓬蒿有逕通賓至
薜荔爲衣稱體裁
晚樹行吟烏鵲遶
高臺搔首鳳凰來
青山對酒渾無恙
不共湘臣賦九哀

野菊參差對鬢蓬
岑牟聊可御秋風
冥鴻久已翔煙路
磨蝎空聞據命宮
未敢呼驢爲令僕
絲他黏雀譟兒童
老夫閒飲東籬酒
笑向江天矚晚虹

聖時原不忌文章
刻畫寧過翰墨場
以手持螯同吏部
脫巾漉酒學柴桑
疎林赤葉懸梨實
晚晦黃雲起稻香
月下犬聲渾若豹
欄川彌可發吾狂

日月蘆中有健身
嵯峨龍性近金馴
但存形影周旋我
詎屑談諧戲客賓
世事不堪浮蟻芥
佳時未可略鱸尊
閒來把釣青谿上
饌

客時時炙紫鱗

掩卷秋懷倍洒然步檐倚杖望高天
一生笑受讀書累萬事爭如對酒賢
無數殘蜂吟野樹屢聞饑雀噪荒田
蕭蕭彭澤門前柳閒與鄰翁話晚煙

息影何從感吠聲藉予爲樹顧厨名
妄將傾倒訾羊叔未有攀提及李卿
著述不除文士習譏讒彌使道心生
空江夜夜喧寒沙一片蛾眉月正明

古木寒花暎敞廬秋窗燈火細讐書
慙無餘骨支豺虎亦有深文至蠹魚
蘆葉煙波西塞舫杏花春雨北山鋤
歸來行徑渾如此一任雌黃及子虛

著言聊爲浣窮愁高臥無殊五嶽遊
寧患陰陽生虎僕何煩臧否到羊求
詩書不爲吹求賤琴酒還因離索酬
九畹蘭香三徑菊看予拏結向高丘

鍾山隱几見遙青來往卿雲暎草亭峽路不生神女夢衡門甘老
少微星歌從逋客炊牛飯閒有仙人授鶴經白下風光寬若海蜀
莊何必諱沉冥

香岳從傍有爛柯神仙無奈世人何全身未必如蟬蛻避俗終難
恃雀羅高座晚鐘明月吐臺城秋草夕陽多只須斗酒偕朋好散
髮無心一浩歌

曉入郊菴示恒一

辨色投香界沿林聞曙鴉諸天如與晤羣動絕無譁飲露挂危葉
持霜有健花老僧方漱齒迎旭轉楞伽

黃葉秋窗下焚香薄作閒翫能違俗務聊當入名山清夜吟長苦
繁霜鬢不還千峯兼萬壑何日閉柴關

壽內嫂吳母張孺人六十

清時鸞耀重衡門遙憶秋花映酒樽龍種並看騰令子鳳毛還與

煥曾孫雲霞天路傳機響烟火人間露爪痕莫道藐姑御冰雪六
珈薤服待翩翩

里社歡聞祝介眉豈容坦腹輟陳詞久從鸞史占佳耦更向熊丸
習令儀玉洞桃花炊作飯春庭琪樹競生枝高岡白石星如斗青
鳥遙看自赤墀

壽胡中翰子延六十

子延汝南人

金門大隱欲如何散髮歸來綺季歌江左風流推掩映汝南月旦
舊嵯峨墨兵視古無堅壘棋局從傍有爛柯笑摘紫萸擎碧酒與
君共醉白雲阿

初度王式玉以詩見贈用韻賦謝

不顧覽揆辰遺身向往佳壑微覺秋草香頓使塵情略曙月尚銜林
青山復綿郭君亦策晨曦相尋破蕭索微吟觸吹生奇懷傲雲濶
共展北窗書如告西疇穫人生舍友朋未省何者樂持茲撰酌懽

一謝勃谿鑿仙的何遙遙深霞閉靈藥君身卽青蓮君詩卽丹萼
感此紫芝心長歌盡三爵

初冬雨夜同損之雪葉坐栢城精舍共用林字煙字

微雨蕭蕭夜眞機此際深所欣燈影下相對古雲心落葉悟人事
寒空淪梵音翛然高枕夢知不媿長林

竹境罕人跡茗香倍洒然中林諸葉定深戶一燈懸道覺青山泰
身參白社賢蓮花高頂處更欲臥蒼煙

緝汝入山見訪卽信宿古雲居感賦

寒雲積葉滿山阿對酒同君一放歌洗耳忌逢牛飲處解嘲其奈
蝨禪何坐臨深夜吟逾健臥入高煙夢亦和幸有持霜芳菊在燈
前香影共婆娑

知君共切採芝心落葉聲中特見尋是地誰能問礧礧斯晨藉以
失蕭森樽中美酒綠長滿籬外寒山青更深擬向晴峯徧投策高

吟一抵少文琴

寒花留艷照離居
琴酒陶然似敝廬
投世好裁申甫頌
畏人莫述西山書
機忘林狃長窺果
候至山僮細課蔬
到底帶經殊好事
看予獨荷邵平鋤

野身曾不異孤雲
禽尚襟期藉有君
籬黍詎牟雞鶩啄
荷衣無賦鹿麋羣
高峯斜日閒中見
落木空山定裏聞
蓮社餘香還未寂
不妨稽首向迦文

宿古雲居再成

烟霜深可宅高枕
向其中靜念塵間
日何如竹下風吟
長寒雨並夢恥世
人同遙憶鐘聲外
千峯碧未窮

楊駕部水心以書見別即走筆送其之嶺南任

奇字玄亭叩不窮
冰霜更與著清風
一官藹薄難充馬
五嶺旛開已畫熊
夷落生成諸島外
山農畊鑿百花中
公餘定有陬隅句
好

折疎麻及釣筒

聞君官舍日鳴琴不改花源避世心共指青山紫別思更貽玄草
及荒林身經煙雨吟逾切交至文章夢亦深嶺樹繇來盈橘柚定
知寧采入重襟

入山柬緝汝玉式

青山良可親煙霜更交驚寧取耳目娛要識性情寓繫戀亦宜屏
矧復墮憂妬敦悅心不違撰酌旨非誤于野獲農談開門識樵路
誰謂謠諠言非我息機具候淨孤藥存林定百聲赴高梁窺燕雀
閒籬散雞鶩古人意至時去此不復顧採薇兼採芝長謠入煙霧
向謂不近情今始達其故

送弘覺寺崇梵入院

丈室天花散不窮看君天闕自鳴鐘好持滿義參孤月每舉西來
示萬峯禪思靜觀當晝樞經聲長展隔谿松蓮花更續高賢社願

附宗雷振道風

兜率巖晚眺

擬向遙峯語當窗雲不行倘然廢言謔何以謝松聲霞日相摩處
江天欲暮情悠悠鳥飛外于此悟浮生

寒山何靜穆靄靄發蒼煙始覺高峯下邨居人種田牛羊黃葉路
雞犬白雲天指顧巢絲在予情亦已偏

寄杜若冲

高人隨寓臥高霞瀼水東西未是家燕市懶沽平樂酒春風散盡
杜陵花禪心泥絮渾同定世事滄桑未較譁特掃幽栖巖畔石待
君攜手閱昏鴉

空林何以慰朝饑雲外還餘綺季芝片月白于霜滿夜千峯青在
夕陽時楸枰翻覆閒方覺蔗味清甘晚漸知婚宦吾生成已矣與
君莫負向平期

少年行

少年結交能結心謂天蓋高海蓋深
脂等閒以身代何況土芥
千黃金憶昔殿爭遼事時赤手獨拍
撩虎鬚昌言繡衣果何罪
妬人安得陳偏詞疾聲遂逢九關怒
磨牙伺影無朝暮倘非解腕賦
歸來燐青血碧安知處三朝要典如
束薪孤臣名姓猶鱗鱗謂予
袒左江夏袒謂予身後壽春身日月
太清妖焰止浮雲歛忽橫空
起昔之饒舌虎圈夫今也酖人羊叔
子一身夷跣可奈何夜長白
石聞牛歌觸步之間成灩澦逢人所
在張虞羅青山明月徒相照
烟空木落同損叫釜中敢作豆其聲
簪前且索梅花笑平生不識
王叔文亦無書據李將軍靈均一往
萬事畢椒枯蘭苑何紛紛高
枕黃粱天未曙安得春夢婆與語夕
陽朱雀宛其過怒潮白馬公
然去乃知年少徒英雄夷門荆棘喧
秋風挂帆長羨鴟夷子買絲
枉繡平原公

山夜有懷馬中丞瑤草

寓影高峯上孤懷好自持青燈炤人夜黃葉滿林時百衲寒初覺
千巖霜可知遙思蓮社客定不隔心期

青巖明月下流響有猿音無駭香林梵偏淨者心吟身臨夜健
夢路入霜深何日巾車至同鳴石戶琴

輓徐侍御孟麟

憶昔侍從明光辰推君嶽嶽批龍鱗攬轡徧詢周道俗解衣長徙
漢家薪孤鳳遂爲鷹隼嫉長沙儋耳同遷謫高遶刷羽入青雲易
地拊心歌白石十年抱犢耕江田君官再起之西川雞黍坐傾春
社酒鶯花一繫海門船苦竹猿啼滿江霧青簾白舫遙遙路予亦
避地歌五噫移家卜築金陵樹移文未至君且歸草堂松菊爭相
輝百慮不關蝸角鬪一樽相對蟹螯肥傳家代有青緇字苟龍謝
鳳曾何異藜火長吹太乙燈角巾每過嵩陽寺雒下香山接古歡

竹林作達交盤桓鱸魚入饌期先至烏臼啼枝興未闌今年三作
訣絕語自云旦夕騎箕去疑是逍遙偶爾言不道脩文名果署石
麟始悟再來身維摩示疾無兼旬宛爾梅花能引夢超然桑扈返
于真卓犖家聲齊萬石出處平生況貞白頑艷焚香陳薤辭衣冠
執紼盈槐陌狸首興歌予更深寒雲落葉懷人琴悲涼莫問龍蛇
歲侘僚長爲鷗鳥吟大招詎省人間苦鵲鷗畫嘯山鬼舞安得從
君白玉樓赤文綠字相參補

祖堂月夜同緝汝式玉繼之損之夜話感賦

欲暮鳥何適寒林若顧儔感君敦古處結侶到荒丘觸月諸烟泯
專霜一壑幽竹房嵐翠切山夢亦悠悠

夜縱高峯話清機未可名山燈參爾汝霜月撰平生吟苦葉能肖
鐘嚴籟莫爭不知雲盡處何自至猿聲

題陳麟生小像

九子蓮香青不改秋浦烟波復誰在忽覩丘壑圖畸人兩兩清音
領其概百尺樓居何岸然投轄囊無沽酒錢一編松下自晨夕薜
蘿到眼生雲烟我擬鹿田聽春雨採芝更欲登天姥君其振策相
後先莫受人間稻粱侮

眞州僧純一見訪

一衲江雲外潮音滿梵宮觀心松影下證道竹香中白晝開禽語
青山訪鹿蹤每欣入林會支遠定相從

荷鍾有時暇閉門長讀書偶然香剎客顧我寒山廬但噉荒厨麥
聊陳儉歲蔬青峯相視笑禪意已無餘

與治社兄入山相訪感賦

指顧寒山翠亦深悠然卷夢入鐘音故人篤有停雲思中夜同爲
梁甫吟黃葉細鳴千嶂雨青燈靜炤一生心步簷起視星河外人
世桑滄任陸沉

世情抱鄰閥應知曠野難陳兕虎詞忌到鬼神無避處交稱金石
卽危時子雲玄有重增草綺季青多未採芝努力荷衣兼麥飯春
山莫負白雲期

鄭同年章莪同乃姪扶九表侄沈履長入山相訪賦謝

栖影向孤峯松深夢長綠于此寓身心兼以謝塵譴故人輟含香
遙就白雲宿顧我啄巖扉班荆話疇夙一抱康成書再尋子真谷
投策破高烟開琴響寒瀑山厨何所陳山樽酒還煖閒損旣流音
歸禽復延目盡此撰酌歡曠然散幽蓄送君立山阿斜陽寄修木
仰視雲間鴻還抱谿中轡別後懷清風冷冷倚霜竹

劉赤存以聞虜警詩見寄用韻賦答

擁褐扶犁願不違長空倦鳥已知歸一樽自對青山笑繞屋時看
黃葉飛媿以殘形負謠詠原無福相稱輕肥閒來手捲前谿釣獨
上高峯自振衣

蟻視誰云不忌才
禰生詞賦過鄒枚
苑中寂寞麒麟臥
臺上虛無鳳鳥來
徑藉蓬蒿宜永閉
衣非薜荔莫輕裁
江漁已斷昆明夢
一任東方辨劫灰

飄風四起撼陳人
敢謂虛名觸鬼神
久矣伊周撝詎許
曾無巢許避沉淪
銜杯值月難容嘿
策杖探雲詎厭頻
欲酌公榮待花發
一林香雪醉清真

侏儒飽粟敢籌邊
穉事東臯幸已偏
肉食豈無桑土策
農臣空爲杞憂懸
孤峯榭葉玄猿叫
野水荷花白鷺拳
但願昇平銷戰伐
漁樵長得臥高烟

舞羽頻年未格兇
鏡歌今擬奏膚功
樞中風雨多帷策
聞外天山有箭峯
但使空譚消白馬
何難痛飲抵黃龍
懸知露布傳聞日
禁裏千官拜曉鐘

客舍讐書尙佩芸
知君封禪著云云
經傳藜閣推中壘
譚取茗柯

亦冠軍白日身親爲髻結清宵舞不待雞聞凌雲旦夕聲名動筆
研君苗莫浪焚

壽范華陽五十

人生取適意意適卽聖仙借問東海藥何如南晦田華陽隱君已
解此一生高臥烟雲裏自操短鐮領烏犍或引長竿釣鱸鯉山青
每至山花開流鶯相勸且銜杯紙帳蘆簾紛笑語逸妻稚子喧樽
罍五湖懶挾鵝夷策塵嚙嗷嗷謝谿刻中厨雞黍能具陳世上公
卿漫相識長者車多至草堂接離岸仄頻相忘藜杖支雲過藥圃
松花滴乳鳴糟牀君但往還無所預騎驢偶向城中去片言立解
蹊牛紛忘機欲共江鷗語此以月旦咸多君謂君行誼高秋雲通
人頗類仲長統逸氣能追宗少文今年嘉平正當艾梅花簇簇迎
征蓋蒼舊長逢峴首人衣冠不減香山會如君耕鑿堯時天生平
結交多豪賢買山大隱卽瀛嶠與人古處皆彭錢石竹青青山酒

綠爲爾提壺更乘轡醉來遙指天台雲春深應覆桃花屋

山中述懷柬方肅之何元瑜

蝮蛇何所毒食性疇能捐蜚蜉弄丸泥自負香且妍人情自若爾身閱知其然雲峯劃樵路平野饒蓄烟塵事倘未訣隱意何絲堅孔墨良誤人沮溺何其賢青山窮始歸孰謂非予譽

魴鱖游大澤傷此枯魚魂小鳥觸樊籠何如雲路翻久諧逸民趣頗惻城市喧栖栖未能割濡滯良有源文史弄清娛親故陳話言相逐豈乾餼厥乃倫性存不謂棘路中鳩鳩亦以繁揮手不及辭跳浪如孤獼生當假枯蓬化則埋草根代謝谿刻嘲斯知妬者恩

圓明過訪即同如幻朗然昂之肇乾游吉山盡日還

抱此太古心翛然謝塵滓身入一峯定慮觸諸雲起如何百霜下草木香未已天花覆石路應器汲寒水爲有鳥巢人顧我翠微裏清機省竹籟高譚墮松子空山發印光峨嵋月盈指

一身等枯蓬去住隨所向既整蓮社盟復策香林杖形跡盡捐脫
耳目轉蕭放采橘敦野心烹葵謝清貺鐘聲前峯來又欲窮幽曠
古木聞禽啼深谿覩雲上施咒及罽師行吟接樵唱歸途逢暝烟
悠然返青嶂明燈寂何言一悟百爲妄

張宗子呂吉士姚簡叔嵇仲舉入山相訪

巖壑蒼然處身心入此深威君歷烟路相訪至鐘林昏樹倦停策
遙峯寒待琴清宵陳茗粥聊見古人心

亦有同心侶遙遙問薜蘿其人即冰雪相向在星河我法尊龍性
時情忌鳳歌何如黃葉下燈影炤維摩

三昧律師別五年矣近闌戒報恩寺詩以代晤

憶昔入東林林中響寒雨信宿臥竹房夢與遠公語五載復經過
師已衡陽去洞庭烟碧楚峯低苦竹參天猥畫啼水族凌波聞梵
唄嶽神降節受毘尼清涼遠應文殊會片帆遙挂青山外城隅蘭

若話秋燈荳葉藤花滿幽籟折蘆東去不驚鷗綸竿明月長悠悠
手持秋水蓮花戒施徧春風杜若洲維揚詩酒風流地戶戶旃檀
領香氣屠門爭賣解牛刀罟師自裂呼鷹器天花颯颯石頭路頂
禮香雲遍緇素偏予白社久要人雞骨亭亭枕荒露宗遠論交二
十年支牀廻首何依然世事寧殊觀槿日人閒幾度成桑田一身
槎牙等枯木時情見毒若堇肉綺語還思就羯磨讀律春山春草
綠

得徐太守眉齋書附答

憶從薇舍接光儀金掌天中玉樹姿虎竹遠詢盤瓠俗鱸蓴還問
泖湖期定知磻戶羅青桂遙向雲峯鬪紫芝安得烟霜披夢路挑
燈一懨十年思

歸來未敢賦閒情直向漁樵瘞姓名青史儘多春夢語綠疇何負
野雲耕閒看日下歸鴉色細聽林中乳鶴聲採藥不還人世改幾

回搔首笑蓬瀛

送陳路若北上

知君才與孔璋倫典盡鸛裘不厭貧但有故人同睨笑只將高咏
答烽塵長途對月樽應滿邸舍占雲夢欲新烟草爭繁鶯競語還
來共醉白門春

鷺子上人持袁田祖書相訪

亂雲兼積葉山路已難尋將影入飛鳥知君有遠心潮踰湓口濶
煙向石頭深相對無言處蕭蕭月滿林

不盡青山影南詢路正長手攜洞庭月來炤白門霜百衲勝雲冷
寒花寄夢香因君思雪臥蘿薜亦蒼蒼

六合孫文學元一移居金陵

移家來就秣陵雲松菊蕭閒可論文震澤鷗夷隨棹載桃源雞犬
一江分金聲欲擲天台賦竹逸還尋巢父羣擬待春山蘭蕙吐入

林相與醉清芬

用韻答方伯呂見訊山中

起臥寒雲外身閒夢亦然君詩還念我予意已忘天聽雀噪荒樹
驅牛耕野烟何時策高屐良話敵山泉

山中述懷寄林茂之

寒林等空界山葉定無機但脉月何在斯知心所歸翠微燈自照
滄海事多違塵夢難干處高峯獨掩扉

白雲無所擇似與道心親朝夕坐巖下對之如古人修烟長領夢
深月恐兼身百慮都捐際閒觀浩劫塵

采芝入深谷綺季亦何勞尙有忘機者悠悠謝桔槔雲深龍首晦
天遠鴈痕高不手斯爲聖何心釣海鰲

但有聲聞在千峯遂不深至人歸踵息末俗忌行吟月白開猿路
山青愜鳥心桃源烟已破更欲訪雲岑

讀姚敘卿先生錦石山齋詩集柬克脩文學

遺身向寒野跡晦意已舒仰眎雲中鴻俯狎川上魚倦則掩荆關
燃薪讀我書姚公江左賢遺草垂璠璣縱轡大曆前追步王與儲
盛年解簪紱嘉遯攻菑畬五馬臥荒田帶經而荷鋤其人卽羽化
其咏留耕餘明霞冠崇巒華月流清渠道著言亦存芳躅寧翳如
鳳鳥去不返德輝良可儀達人薄世榮高咏秦淮湄錦石結山齋
寧異穎與箕種苗滿東臯種菊沿東籬綠酒激長謠素琴颺清颺
挺此孤松節不爲桃李欺樂志五十年笑與人羣辭拂袖尋洪厓
揮手招安期何用貽後賢奇字懸纍纍陰門覩高槐綠堦踐華芝
振衣望青山恨不生同時

吉山菴似穎中上人

結宇大道傍片雲別凡聖門外喧行塵堂中響清磬留客飯顚香
茗蔬亦虔淨身因藉草閒慮覺栖鐘盡演梵數花飛安禪一松定

始悟紅塵邊亦有青蓮境

吉山寺

雞鳴黃葉中意謂人家住緩步歷斜陽遙見招提露旣至漸幽豁
木石澹成趣池涸曝龜藏簷煖壺烽驚昔者所聞鐘今乃識其處
老僧三四人推雲出蓬戶相肅謬恭敬莫測去來故茗話不及申
又指歸鴉路

湯彙茹閣樸彌夜坐

獨往存微尙寒山雲正深感君齋鏡具長話至鐘音露響琴開夜
烟衰月到林今宵巖下夢知抱古人心

一笑晴簷下壺蜂吟太紛因推人世理何必異浮雲野月留鴻響
高松斂鶴羣子雲無別尙頭白益攻文

杜若沖一門入山相訪

孤雲無因悠悠入深谷明月懸香林照我巖中宿蓄此高閒情

與君共茗粥觀時悟已饒懷古意逾穆蓬池列山樽讓西縛茅屋
誰能違野心而徇雞與鶩寄夢烟霜間蕭閒若邨犢一覺聞堂鐘
千峯響寒木

人情若雲烟身歷知爲爾笑引盃中泉始悟寒溫旨桃李嘲春風
芙蓉陰秋水曾不異零落感嘆孰能已峩峩厓上松百尺蒼寒起
華月巢其顛青芝被其趾指此與君盟冰霜礪吾齒鶴飛丹嶂外
猿嘯蒼谿裏永矢逍遙游持謝嬾嬾子

鷺子入祖堂

相期未卽來遙共青山語孤錫問所從笑指鳥飛處寒藤挂松門
山月不能去枯薪手自燃澗泉薄能濾安坐竹房間燈前剝霜蘢
戴馭長同其令嗣入山相訪

荒林雞骨已無餘尙有良朋問索居吾道不衰東魯鳳鄉心何慕
武昌魚青山安道翻乘興白首揚雄更著書獨羨仲方纔髮燥寒

雲石路自將車

大隱曾同金馬門十年抱犢臥江村相看雙鬢已如許但醉一樽
何復論日月詎隨烽火逝詩書藉有典型存與君窈窕迎山月九
辨爲招薛荔魂

三昧律師禮塔放光偈

僊掌蓮花峯湧出長千里紺碧妙空色雕琢昧恆理千燈向何燃
鍾山翠微裏忽然浮屠間靄靄毫光起一氣冒晴虹五色炤秋水
優曇花似霰兜羅雲若綺未有風雷動莫是鬼神使或云珠射衣
或云月標指或云無盡燈或云舍利子此但譬光相咸未達光旨
請聽豐干言一袂幽明理爲是毘尼僧定光相撥耳

和香雪竹影社詩

江湖青一髮匡廬現纖影夢入白蓮池幽香觸深省不知寐覺間
何者是眞境百蟲挂秋槐而別柯與癭習心成習見譬若蛙居井

清泉喧石瀨華月吐高嶺山精何睢于弄此瀟湘景雪公石門秀
植戒如笈簪身與霜松嚴慮若秋蘭靜藉此豐干舌重剝香巖笋
寄社空烟中提唱諸雲冷

緝汝損之入山僧白岳亦以饋藥至

閒身無所營白雲並高潔靜悟軒冕榮何如農晦拙悠然無限意
欲與青山說烟隙望歸禽因以見來轍故人懷屏居中車背塵涅
亦有蓮峯緇藥壺手自撚貽我紫芝苗授我丹谿訣感此物外情
開燈肆娛悅山杯互斟酌山蔬及萌蘖坐久巖竹鳴微見林間雪
人幽肅視聽談深失寒冽遙哂剡溪游孤舟汎漻汭興盡損鶴啼
方此詎不劣

周仍叔至山相訪寄謝

霜枝匝地已無葉筇杖撥雲能有聲息影幽栖荒寺裏感君遙作
寒山行相看蠟屐寓深意不爨樵蘇非世情南舍梅花笑曾未杖

黎漸覺香風生

君所負才若冰雪青雲意氣爭相高授經養母必甘旨展卷獲古
窮纖毫聖世何憂有蘊軸晏歲復不辭綈袍海運于人指掌爾相
逢且鋪糟牀糟

贈蒼如上人

手撥寒爐灰吾愛寒山子櫛櫛詎淺悟茗糜關至理上人精梵行
復達香積旨笋參玉版機飯抄雲子美濾水百蟲活撥食諸禽喜
炊餘作務閒明燈翠微裏閉戶轉楞伽響落秋潭水

空山詩

酬余未也見訪

空山安處日月其靜竹陰閒窗松栖高嶺獨行潭間泠泠見影未
謂寒林亦有來跡投策班荆良朋如汐而我調饑渙然冰釋香雲
定水夙戒凜如載蠲賢酒亦屏枯魚中厨樸略炊黍及蔬敬爾離
居雜陳心曲氛淨天青風暄野綠時詰騫鵬上農抱犢茫茫烟海

詎測所終軒皇何德王霸何功望而不見俯仰寒空言話薄舒昏
烟生野送君竚立顧步巖下孤雲來去各自瀟洒

出安德門至先塋感懷

古棘寒雲滿墓門自驅羸特到荒村孤蹤可與飛蓬較儉歲彌知
脫粟尊草澤軍聲長廩至中原胡騎且蜂屯野人愛國多逢忌但
聽風巢夕鳥喧

俯仰荒寒祇自疑高達大陸念何之魯人詎釋犂裘謗宣室難收
鵬鳥悲直北邊笳吹轡壠江南征稅盡漁絲獨憐憔悴江潭客衰
白經年厭鼓聲

楊懷林招飲

抱雲臥高峯偃坦意俱足覺聞剝啄聲泠泠響寒木田父有佳懷
告我山酒熟炊黍隻雌相招過茅屋斯旨詎何違感此念非瀆
投策共飛鳥入門聽鳴犢脫略形跡間銜觴話心曲淹留及暝烟

籬山縱恬目罷穫務已閒負暄體長煥努力指菑畚誓保春疇綠
壽周相國挹齋五十

功成賜履向巖扉玉女潭中洗藥歸松籟不驚弘景夢梅花爭映
長源衣機酣帶欲逢僧解柯爛棋長與客圍回首四朝潛見事金
滕道在復何非

懸車寧異采真遊二沱烟雲象十洲熊夢何曾疎渭水鶴經重與
註浮丘留侯隱去尋黃石江總歸來羨黑頭寄與天台舊芝本花
間聊以代觥籌

過范華陽山居

過君雞黍地真意滿衡門賓客盡親故漁樵非市言林稀山可數
雪罕氣長暄不是昏烟起誰能背酒樽

大隱隱畊稼悠悠遺歲年參魚積陂水縱鶴響山烟此際乘軒貴
何如荷鋤閒春雲如海白莫憶五湖船

用韻酬達旨上人過訪

洞門殘炤捲蒼藤
苔上摩娑佛字曾
一錫遠經牛首路
孤峯共對鳥巢燈
身將枯木銷諸業
舌卽蓮花轉大乘
今夜問君巖下夢
石梁寒瀑雪層層

同瑤草中丞夜賦

高峯寒夕縱高談
往事烟飛夢亦酣
太史不堪占斗北
將軍誰是戰城南
春村芳草長驅犢
暖箔柔桑自護蠶
願取太平終不改
逐臣何必賦江潭

寄張五雲使君

靈光月旦著高評
爲政尤標嶽嶽聲
春煖雲依朱戟吐
夜閒月向玉壺生
桑麻石戶頻詢俗
雷雨滄江誓洗兵
自哂野身無所繫
幸依化日一躬耕

盱衡何地不風烟
澤國深知保障賢
村靜機聲喧夜織
山晴畚火

炤春田繙書研北無千古解澤江南有二天何日岑牟趨幕府山
公同醉習池前

寄懷許惺菴

何年一別許玄度三十六回春草青雙髯向人若霜雪九州無地
非滄溟天台藥路窮窈窕西塞漁烟連晦冥尙憶雞鳴秋埭裏讀
書共拾蓬中螢

聞君刀州不得意大笑解組歸江湖鷄肋于人已而已蟹螯到手
無時無一身長嘯裂金石諸子繞膝如珊瑚予欲乘舟向明聖釣
魚射鴨歌烏烏

聖羽避亂至山盡談樅川被賊之狀

樅川自昔魚鹽地烽火稜稜幾戶存幸爾獨違薪木室與予共臥
梅花邨縱橫尙傳盜賊劇拮拾獲有妻孥殮爲視寸舌正無恙殘
年且盡寒山樽

何草不黃燐火碧爲儒逢此行獨難饑來詩書悉長物亂至憂懼
彌更端野豕學人立殘壘羣鴉啄骨鳴江湍國殤于此賦不盡鼠
輩白馬猶桓桓

謝劉上海用潛雪中至山相唁

古誼炤人向誰是感君挂劍寒山行一官囓雪遂解組萬里出塞
能徵兵故國軍書正鹵莽中原胡騎何縱橫而我無知若萇楚風
前細聽梅花鳴

峩峩積雪炤天地較子寸心亦復然四壁移家載玄草十年作吏
惟青氈負薪饒有叔敖裔種秫安得柴桑田自炙屠蘇獵兔相
遲盡醉春花前

柬張少司徒繩海

蓬窗樽酒尙依然別後芳蘅夢獨懸秋野自諳呼懷語春風遙爲
聽鶯遷籌邊久著祁連績轉粟新推鄴相賢但願六師乘宿飽饒

歌振振動江烟

博望槎從江上過自憐屏跡向荒蘿青油未共江天酒黃竹無聞
雨雪歌九子農謠春塢暖青谿漁唱晚烟和野人願得陳簞食一
向鈴門挂短簑

除夜述懷寄瑤草

空山雨繁霜靜夜恆自知百慮攻一心撥去還我隨時運如風潮
來往不可期探薇亦已餒乘桴亦已劬山海有痕轍賢哲鮮遁諛
用晦而求仁跡蘊神則怡世人習夸浮貿貿不自嗤昧此文明理
謂爲陳苦詞

白首未聞道感此日月征逝者胡端倪祇覺天雲明陽林花已坼
暄草念當萌斗轉候且殊天地何其誠我非草木姿詎屑隨世榮
冰雪抱崇丘松柏獨懷貞山杯撫春醪玉琴流古聲汎覽羲軒書
遺此耳目情

飄風撼四極，愾嘆不可收。
萌此杞人心，謂我何所求。
不如偃中野，耒耜驅犁牛。
雨雪滋下土，土脉聿以柔。
麥芽行向青，老農卜其秋。
長歌追暝烟，卒歲良優游。
日夕然荆薪，琅琅誦墳丘。
沮溺亦可耦，周孔亦可讐。

兀然土室中，仰視寒空語。
飽食而曲肱，少壯倏已去。
高軒何誤人，憂患莫予恕。
悔不蚤荷鋤，畊餘事箕踞。
遙視城市間，烟海浩無曙。
吾友寒歲松，亭亭表森著。
一身備川岳，巍然九州譽。
拯時策若屯，安禪性長豫。
藹藹春山雲，陰我支牀處。
何不巾車來，爇灰剝殘蘚。

詠懷堂戊寅詩卷下

終

TOHOKU UNIVERSITY

MAY 15 2001

